



Sastanak sa predstavnicima medija i NVO sektora iz Sandžaka
Novi Pazar, 20. jun 2017

Stavovi u vezi Akcionog plana za nacionalne manjine

Nacionalna vijeća nacionalnih manjina pojedinačno ali, i udružena kroz Koordinaciju suočavaju se sa mnogim problemima u radu, a što se najbolje pokazalo na primjeru usvajanja Akcionog plana za ostvarivanje prava nacionalnih manjina.

Akcioni plan, u procesu izrade, nije uvrstio bitne prijedloge nacionalnih vijeća nacionalnih manjina i u sebi ne sadrži ključne obaveze države Srbije prema nacionalnim manjinama.

Akcioni plan je usvojen u manjkavoj proceduri i nije razmatran od strane Savjeta Republike Srbije za nacionalne manjine koji čine predsjednici svih nacionalnih vijeća, šest ministara i predsjednik Vlade.

Republički savjet za nacionalne manjine je svoju posljednju sjednicu održao 3. novembra 2015. godine, a u 2016. nije bilo sjednica Savjeta. Akcioni plan je 3. marta 2016. godine predat Evropskoj uniji.

U Akcioni plan, također, nisu uvršteni prijedlozi BNV pristigli tokom javne rasprave. Tokom javne rasprave, BNV je uputilo 393 prijedloga redovnom, a 105 putem elektronske pošte.

Također, verzija Akcionog plana za manjine koja je usvojena, zapravo je lošijeg kvaliteta od one koja je bila predmet javne rasprave.

Takav Akcioni plan za ostvarivanje prava nacionalnih manjina je nelegitiman i potrebna je njegova revizija.

Bošnjačko nacionalno vijeće zahtjeva:

1. Da Vlada Srbije donese odluku o reviziji postojećeg Akcionog plana za nacionalne manjine
2. Da Vlada Srbije osigura da prijedlozi i zahtjevi Bošnjaka i drugih manjina budu adekvatno razmatrani i uvršteni u sadržinu novog Akcionog plana
3. Da se novim Akcionim planom jasno definišu aktivnosti koje država treba da učini u rješavanju problema manjina
4. Da se jasno utvrde nosioci aktivnosti u ime države
5. Da se tačno i precizno utvrde krajnji rokovi za završetak aktivnosti
6. Da se odrede potrebna sredstva za izvršenje aktivnosti i izvori finansiranja
7. Da novi Akcioni plan dobije saglasnost Savjeta Republike Srbije za nacionalne manjine.

Sva nacionalna vijeća zasebno opterećuje i činjenica da zakoni koji regulišu pitanje nacionalnih manjina u Srbiji nemaju ni jednu obavezujuću normu niti kaznenu odredbu. Iz tih razloga nacionalne manjine nailaze na česte, nepremostive prepreke u komunikaciji sa državnim organima, lokalnim samoupravama i drugim institucijama i organizacijama.

Mjesto: Novi Pazar
Datum: 20.06.2017.

Bošnjačko nacionalno vijeće
Stručni saradnik za informisanje
Emir Bihorac